

von Wulf Wager

Fraua plogat sich onaidig



I fend, Fraua send von Natur aus schee. Die meischte jedenfalls. Also meine, ond onser drei Mädla, ond onser Enkele naidierlich. Aber dia, mo et so schee send, miassat sich halt a weng richta. Spachtla, aufmotza, frisiera, ufpimpa ond ufpolschdra. Wie hoißt en aldr Spruch: "Ondr ällem isch Bschiß, bloß ondr dr Milch isch Wasser!" So isch's bei de bsonders rausputze Fraua au. A manche mecht i do net morgens glei noch em Aufstanda seha.

Bsonders pervers fend i, dass manche Fraua moinat, sie miastat High-Heels traga. Drbei geit's nix o'xünders als so hauche Absatz. Beim Film-Fescht in Cannes hot dr Vranstalter sogar a High-Heels-Pflicht eigführt. Des hoißt, die ganze Stars hend in denne o'bequeme, o'xonde Pfennigabsatzschuah a'tanza derfa. Mein Gott, wie domm isch doch d' Welt.

Mei Nachbere, Sia wissat ja, des propere 150-Kilo-Prachtsweib, isch eigentlich am allerwenigschta für solche Marterschuah geeignet, aber dennoch moint se, dass se am Sonndichs en d' Kirch mit dene Denger stolziera sott. Wobei - stolziera ka mr des net nenna. Des sieht von henda aus, wie wenn a Brauereigaul auf gsottene Oier lauft. Dui sieht von henda aus wie elfe ond von vorna wie dreiviertl zwelfe. Neulich, wo se von dr Kirch zrick komma isch, hot se mir ihr Philosophie vrrota: "Männer send wie High-Heels, sie ten oim weh, abr mr liebt sie trotzdem."

Also i lauf liebr en Schlappa - ond mei Frau au.

Bis näggschd Woch'

Ihr

A handwritten signature in black ink, which appears to be 'Wulf Wager'. The signature is stylized and written in a cursive-like font.

Alle Kolumna zom Nochlesa
ondr www.woascht.de